

671.3441
078
130

光州志

光州志卷之十

光州直隸州知州楊修田總纂

〔列女傳〕

春秋

孫叔敖母

孫母楚令尹叔敖母也叔敖爲嬰兒時出遊見兩頭蛇殺而埋之歸見其母而泣焉母問其故對曰吾聞見兩頭蛇者死今出遊見之母曰蛇今安在對曰吾恐他人復見殺而埋之矣母曰汝不死矣節列女傳

貞姬

貞姬楚白公勝妻白公死其妻紡績不嫁吳王聞其美且有行使大夫聘焉將以爲婦人姬辭之曰白公生時妾幸得執箕帚掌衣履託爲妃匹白公不幸死妾願守其墳墓以終天年今王賜金璧之聘夫人之位非妾之所聞也且夫棄義從欲者污也見利忘死者貪也夫貪污之人王何以爲哉妾聞之忠臣不借人以力貞女不假人以色豈獨事生若此哉於死者亦然妾旣不仁不能死今又去而嫁人不亦太甚乎遂辭聘而不行吳王賢其守節有義號曰

貞姬

節列女傳

元

高氏五節婦

高氏五節婦俱固始人劉氏高希鳳妻也希鳳在遼東爲亂軍所掠拒而不伏軍怒斷其腕而死劉氏亦被掠行十餘里罵不絕口爲亂兵所殺希鳳仲弟藥師奴妻李氏早寡因亂避難高麗明初攜子姪來歸居江甯府守夫墓誓不再適希鳳季弟伯顏不花爲納哈出所殺其妻郭氏自縊於馬櫪希鳳從子高塔失丁爲父讐誣陷而死其妻金氏與姑邢氏俱自縊於室一門義不受辱奉詔旌表之

志

彭氏

彭氏元末金剛臺丞相彭平第三女隱士葛聚妻也聚避
兵金剛臺平以女妻之後因詔還鄉聚謂氏曰飛鳥反鄉
狐死首邱我祖自宋家於固始之棗莊吾其忘諸汝能與
我俱乎氏遂哀告父母許之時道路多寇執聚欲兵之氏
以身翼蔽傷其左手賊義而釋之

節舊志

馬氏

馬氏光州人夫馮文舉

鄉里失考

官雲南儒學提舉時明氏攻

滇南文舉謂妻曰我元進士蒙厚恩今軍至有死無二汝
光州馬中丞子孫其從之乎馬氏曰官人死余何生爲卽

自縊時人義之

節舊志

明

盧氏

盧氏光山人適諸生佟欽

光山志作東欽

洪武初欽父旭官御史

坐事謫戍雲南臨海衛未幾旭歿有司錄其家以往盧與
欽奉姑行姑亦卒至臨海欽從征和泥卒於兵盧誓守有
巨商張某者謀娶之盧乃斷髮自誓會欽之妹偕夫白海
外來張乃厚賂妹求婚妹屢言之并強致聘具盧弃其物
門外號哭三日赴海死土人乃建祠祀之御史毛鳳詔嘗

記其事

節南海志

朱氏女

朱氏女固始人孝子璧之姊性貞靜爲父所鍾愛初父疾
草諸弟尙幼命之撫育并操理家事及卒誓不適人後諸
弟成立聘者屢至朱皆以父命辭凜然以節自守鄉里重
之號曰女士年八十無疾而卒

節舊志

李氏

李氏光州人年十九配汝寧鎮撫張文昌文昌父惟一守
北平卒於官昌備歷艱險扶父櫬葬於州城西氏偕夫孝
事其姑樊氏踰年夫歿子顯甫一歲氏勵志撫子奉姑州
守賀祖嗣憫其節月給米一石後姑年八十終氏亦享壽

九十有四

節舊志

阮氏

阮氏州人易仲淹妻歸易九月夫故遺姑秦氏阮奉養孝謹貧不能贍紡績度日族長憐其少寡欲改嫁之阮曰如我嫁孀姑誰其養之况夫故遺姪已三月吾寧守節事姑明年果生一子曰勉撫子成立事姑盡禮內外賢之知州張輝傳其事知州薛鑒表其門

節舊志

丁氏

丁氏固始人張仲仁妻年十八適仲仁仁卒於行伍氏日夜號泣挈夫骨還家既葬守節事姑親族欲奪其志誓死

不易

節舊志

沈氏

沈氏州人郝昂妻昂死年十九生子郝文宿甫一歲鄉人憐其年少子幼勸改嫁氏焚香籲天斷左手一指誓不再醮有司以事聞誥旌其門文宿以譯字進鴻臚寺序班氏享年八十有五

節舊志

謝氏

謝氏息縣人年十六適諸生岳崇善執婦道事舅姑能得其歡心崇卒氏年僅二十有二誓不再適撫二幼子皆成立氏享年八十有四乃卒

節舊志

彭門二節婦

王氏固始彭永昌妻夫卒無子撫昌弟永江以守江受室甫三載又卒遺穉孤二氏與江妻徐氏共撫孤守節備歷艱辛後江子危行官御史人以爲天報苦節云

節舊志

楊氏

楊氏固始楊舉女幼遭姻訓通列女傳及長適許忠節公達忠節仕樂陵時薊賊猖獗併力勦捕氏襁褓子女內助城守尋轉江西副史稔宸濠將變欲遣歸眷屬氏潛然曰夫當全忠婦當全節及忠節就義勺水不入口者七日濠敗扶柩歸厝誥封淑人

節舊志

黃氏

黃氏商城諸生黃惟吉女適余公思銘之孫永泰性柔慧
有志操夫卒黃痛幾絕尋引繩自經母覺而解之後五日
母防少弛竟自經死時年二十有三奉旨旌表建坊於思
銘祠側

節舊志

張氏

張氏固始蕭可才妻有強賊操戈入其室欲殺可才氏以
身翼盜竟殺之盡掠所有而去縣令薛良親爲文祭其柩

節舊志

鄧氏

鄧氏息縣人年二十二適諸生張奎三載而奎亡生子琦

僅七月鄧仰天泣曰吾夫止遺一息必撫之以承祀或奪
吾志有死而已卒撫子成立苦節三十年

節舊志

張氏

胡氏

張氏息縣長史張公孫女年十九適里人陸和嫻於婦儀
內外稱賢和早卒張守節三十餘年紡績自給教子女有
法閨門肅然又同縣胡氏驛丞宸之女適里人劉佐善相
其夫以賢稱佐卒胡年二十四哀痛幾絕有諷令改嫁者
胡峻拒之教子江成人鄉里服其志

節舊志

蕭氏

蕭氏州人蕭玪女適諸生趙本源孝事舅姑脫簪珥資夫

學舅歿夫哀毀邁疾蕭躬親湯藥未幾本源亦歿氏抱二孤而泣水漿不入口者數日其父母來唁慰氏撫膺絕痛曰我不幸早失所天惟待死而已遂因痛致疾一日告姑曰婦病不起二孤惟賴姑撫養夜分絕纊年甫二十有五

節舊志

劉氏

劉氏州人留通妻夫天無子其家貧氏堅志守節日紡績以自給有勸他適者輒斥之年七十卒親憐禮葬之知州

高應冕表其門曰貞節

節舊志

朱氏

陳氏

朱氏固始饒安妻安卒氏年二十父母欲奪其志氏祝天
自誓閉門紡績教子秀成立後登諫垣同縣陳氏陳銘女
適張英早寡撫子政受室未幾子婦亦相繼歿遺孫祉尙
幼乃哺育成立教訓讀書登進士躋都憲爲時名臣

節舊志

朱門二節婦

正德七年流賊掠固始御史朱冠母李氏妻王氏皆臨變
抗節不屈死有司嘉其烈事聞旌表李係春坊達孫女王
係員外道孫女皆幼習女儀能通孝經列女傳大義故姑

媳同時殉難

節舊志

秋香

霍氏女 葛氏等

孔秋香光山民家女也正德七年流賊分騎掠山鄉至白
雀園遇秋香迫之女罵不從取賊刀刃賊賊怒支解之邑
令李往祭其墓同邑霍氏女年十四亦遇流賊欲污之女
以爪挖賊目出其睛賊遂殺之有司并以上聞奉文旌之
又固始諸生李棠妻葛氏從夫避亂至史河未及渡賊騎
猝至葛氏謂夫曰賊迫矣勢將不免夫婦攜手溺水死羅
英妻黎氏出避寇難寇持刃犯之氏罵不絕口遂遇害商
城桂客妻喻氏遇流寇於廟子岡逼之上馬喻不從罵賊
而死賊平客收其屍貌猶如生息縣董妙聰適里人張九
方甫一月流賊驟至不獲避賊見其貌悅之挽使從行董

罵曰我良家婦肯從賊乎以刀自毀其面賊怒殺之諸生王大本妻胡氏爲賊所迫胡罵之甚厲賊遂殺之時胡年

甫十六

節舊志

孝婦李氏

孝婦李氏侍郎郝璜妻性聰穎爲處子時父語以古列女事能領受適郝事舅姑一執婦道旣而舅姑相繼終李哀毀踰禮朝夕饋奠必求素所嗜愛者璜登進士厯官吏部陞侍郎婦爲淑人悼念其夫之兄及其二子皆蚤世遺孤文富文寵文宿文宗煢煢無依不憚千里攜至官舍延師教之猶已子厥後子冕登進士文宿以譯字授鴻臚寺序

班直文淵閣文宗領壬午鄉薦文富文寵皆爲善士淑人
訓誡之力也

節舊志

李氏

麻氏

李氏光山鄉民女也許聘羅生生家貧遭繼母虐死時女
年十四聞訃卽衣縞素誓死不嫁有富室聘之不從剪髮
垢面扃戶獨處三十年一夕端坐而逝同邑諸生麻袍女
字錢甯未嫁甯家疫癘甚劇伯叔皆死止姑壻存麻女曰
姑病坐視是豺狼也懇求其母同往視之至則甯已死女
煎藥跪奉姑前姑飲之稍愈女欲從夫死母曰爾未嫁何
慮無夫女曰一許卽夫也夜縊死夫屍旁時女年亦一十